

Uni Kato Sokome Nakayáñaró

Juda Iñondutu Unipareko Ñuno Uró Ñu

Mande Kembé

Komo suki uni kato sokome ña **Grik** mandewore nakayáñaró, quko enejo owí kama nekaró, ko uni ñu dani nore hamó kama iñoyoteto. **Anutu koro huru-huru** koro tapá uni komo qundo uni nakayáñaró ñuro owí enesó-enesó ye nekañgurí. Ko itaka ñuya iño-iño kumimbo owí enesó-enesó ye nekoyotetngo. Kumimbo ñande yetetngo, ko Pol enejombo nakayáñaró, kumimbo Barnabas, kumimbo Apolos, kumimbo unipare meywomboro owéye yeyotetngo. Nore hamó kama iñoyoteto.

Do naruko nakayáñaró ñuya kama iñoyoteto. Quko ñande iñoyoteto, ko kumima naru 70AD ñunoko **Rom** unindo Yerusalem koya **Ya Surumí** rambaruruwañgurí. (Asa “70AD” murí muko ñandiro, ko Yesu nimí pisiyaró, yate kumima naru 70 ñunde rotaró. Nore kumima naru 2,000 ñunde rotoro yate itaka yoteto.) Sokome ñanoko uni nakayáñaró qundo **o qa-qa** kumi **Ya Surumímo** teyañgurí ñuro yaró, asa ko enejo naruyómo ñuno watí teyañgurí, peka. (*Hibru 10:2-3* weyo qembe.) Ñunde ñuroko itaka iño-iño uni kumimboko ñande ye iñoyotetngo, ko **Ya Surumí** watí yoníqo nakayáñgurí, peka.

Danimboro nakayáñaró ñu ñuya kama iñoyoteto. Quko unipare ñuko Juda koro iñondutu unipare, imemonggo ta quhurí korowowañgo, peka. (*Hibru 12:4-12* weyo qembe.)

Anutuko enejo Nañuníwore mande nore nimiraró

1 ¹Komo, Anutuko naru kumimo, ore enesó-enesówore, ye-ye unindoro^a mañgoye rero usisambanani mande yimitoyaró. ²Quko

^a **1:1** “ye-ye uni ” ñuko Anutuko mandí yunoní unipare yunañgurí.

itaka, naru wejako njano, enendo Naņuníwore mande rero nore nimitoyote. Naņuní ŋu riní o soso ŋuro simburí taró, ko Naņuníwore o soso towaró. ³Norendo simó ŋu qenero Anutu koro sine parámi^b mu qeneteto. Ko eneņo kiraró ŋuko Anutu koro kiraró naņge. Mandí ŋuko wimbí moré, ko mandímbo o soso riní kondé yorote. Ene uniparetoro quhuríyembo kimo tero, potóye se rotoro, yoriní sara taņguri. Ŋunde tero owé parámi rero wiri yerete uni parámi horémboro kandí kondésina^c samboko kunditaró. ⁴Iwímbo owé parámi Naņuní inaró. Asa owé ŋundo sambo simómboro^d owéye ŋu taka yerete. Ŋunde ŋuro simó ŋundo sambo simómboro uni parámiye tunoqaró.

Naņuní ŋundo sambo simó taka yerete

⁵Qeni, Anutuko komo ŋande miraró,

“Ke neneņo naņone,
itaka keņo awaņge tunoqeteno,”
ko ŋande miraró,

“No eneņo iwí tunoqewano,
ko ene neneņo naņone tunoqeweya.”
Asa, Anutuko sambo simó ka ŋunde mirarómbe ma kini? Ŋunde kini.

⁶Ko Anutuko naņuní korete qu riní nokono umbuweya naruyó ŋuro ŋande yaró,

“Anutu koro sambo simó soso potoruku te inoyuri.”
⁷Anutuko sambo simó ŋuro ŋande yete,

“Sambo simóņo yoriní matú qembe taņguri,
ko eneņo khoyó teyoteņgo ŋu yoriní
kewá suru raņote ŋunde qembe taņguri.”
⁸Quko Naņuní ŋuro ŋande yete,

“Anutu, ke wiri yerete uni yotoro suki-suki yoweya.
Keto otete roneneņowí naņge howero unipareke wiri yereyote.
⁹Ke otete roneneņowí ŋuro naņge metéņoyote,
ko otete piyimi ŋuro piyimiņoyote.
Ŋunde ŋuro Anutukepo kiruwó kembakemo hausuwoní

^b 1:3 “sine parámi” ŋuko eneņo owé parámi ŋunde qembe, eneņo o soso meté horé mu.

^c 1:3 Uni owé parámi moré ŋu naņge wiri yerete uni kandí kondésina ŋunde kunditaņguri.

^d 1:4 “sambo simó” ŋuko komo suki-suki Anutuko unipare kama yoriní tunoqi sambo simó yondowaró. Ko itaka eneņo sunará teyoteņgo.

ningu-ningu parámi taró, ko topokeporo uni kembé yoweya.”
 10 Enendo nyaya nande yete,

“Uni Parámi, komo suki keto noko na ri tunoqaró,
 ko kandeto sambo towaró.

11 Imemongo o soso nyu kini teweya, quko keko suki-suki
 yoweya,
 o nyu tuwi konjomu qembe tero piyo teweya.

12 Keto o soso towaró nyu tuwi qembe re wiwiyoweya,
 kowe punu-punu qembe nyu re rotoweya,
 quko keto nyunde nanje yoweya,
 naru suki-suki yoweya.”

13 Qeni, Anutuko komo nande miraró,

“Keto kandene kondésina nana kunditi
 kejo sanjiríngge yorewe kasirakemo yowango.”

Asa, Anutuko sambo simó ka nyunde mirarómbe ma kini? Kini.

14 Hamó, Anutuko unipareyó rambaruru konjo yoreweya nyu
 ijoro sambo simómbo khoyó teyotongo nyu yorero asá yiriní
 unipare nyu samaka yereyotongo.

Miti mande nyuro kondé ijoyi qembe

2 1 Nyunde nyuroko miti mande^e ijatowó nyu kondé towatoka
 ijo-ijonanimomo yoní. Khe meté mu rotowato koro. 2 Komo
 Anutuko sambo simó^f hutuyo mande^g nyu yimironí usisambanani
 yimirangurí. Mande nyuko kondé yote. Uni soso mira windu-windu
 tero mande nyu karónyoyotongo qundo oteteyembo topé piyimi
 reyangurí. 3 Asa ye date ijotongo? Anutuko kho parámi horé
 tero norero rambaruru konjo noraró. Quko norendo kho taró
 nyuro piyiminyowato tiníqo, topé piyimi horé ka date takawato?
 Nyu mepémo kini. Hamó, koretero Uni Parámimbo mande nande
 yesowaró, ko Anutuko unipare rambaruru konjo yoreweya. Nyunde
 yiniqo, uni mandí ijangurí qundo nore nimirangurí. 4 Unindo
 mande nyu yesowoyuriqo, Anutuko o wimbí moré^h enesó-enesó tero
 mande nyu riní kondéraró, ko enenombo Yuqa Surumímbo puriyo
 enesó-enesó unipare yunaró.

^e 2:1 “miti mande ” nyuko Anutuko *Kristo* asáñoní khumoro quhurínanimbo kimo tiní
 Anutu koya newonde kanata tewero nyuro mande meté mu nanje. ^f 2:2 “sambo simó ”
 nyuko komo suki-suki Anutuko unipare kama yoriní tunoqi sambo simó yondowoní sunará
 teyotongo. ^g 2:2 “hutuyo mande ” nyuko komo suki Anutuko *Sainai* purímo *Moses* inoní
 Israel unipare yunaró. Mande nyuko Juda uniparetoro yoto-yotoye soso sopoyaró. ^h 2:4 “o
 wimbí moré ” nyuko o enesó-enesó tunoqiní Anutu koro wimbí nyunde tunomo yoweya.

Yesuko enejo topé-topé ηunde qembe tunoqaró

⁵Qeni, noko keta qu imemongo tunoqeweya ηuro yeteto. Ko Anutuko sambo simóⁱ yoriní noko keta ηu kama sopoyowaŋgo. Kini. ⁶Quko uni kato sokomeko ηuno ηande yaró,

“Keto uni norejo date ijoyote?

Date koro unindoro nanún ηuro ye ijoyote?

⁷Keto ri umburo naru tukuni nanje sambo simó kusunoyemo yoroní seré te inoro owé parámi inoro

⁸o soso towaró ηu riní kasiramo yote.”

Asa Anutuko o soso towaró ηu riní uni ηuro kasiramo yote, ko oka kato kusunoyómo kama yote qu moré kini. Quko itakako norendo qenero ηande ijoyoteto, o soso kasiramo kama yoteŋgo. Kini, o kumi nanje.

⁹Quko nore Yesu qeneyoteto. Naru tukuni nanje enendo sambo simó kusunoyemo yora. ηunde yotoro kowe surumí parámi tero khumoní Anutuko seré te inoro owé parámi inaró. ηunde tero Yesuko mepénani rero khumaró ηuko Anutu koro samaka-samaka tuwó^j nore soso nunaró.

¹⁰Anutuko o soso ηuro simburí tete, ko enendo, nano-simó qambu yorewe owé parámi rewaŋgo, ye ijaró. ηunde ηuroko otete meté howero Yesu, unipare rambaruru koŋgo yorewero uni ηu, riní umburo kowe surumí tero khumaró. ηunde tero norejo mepénani horé raró. ¹¹Dokoro enendo nore noriní unipare meté horé^k teteto, quko eneya noreya wini kanata na. ηunde ηuro ene, “Topo-topone,” ye neko yereweya ηuro kama piyimijoyote. ¹²Enendo Anutu ηande miraró,

“Nondo ke owéŋge ηuro uni toponemo yesowowano,
ko huru-huruko ηuno seré te kunowano.”

¹³Ko ηande yaró,

“No kinanje Anutuko o te nunowero yaró ηuro sopowano.”
Ko ηande yaró,

“Qeni. Noya simó Anutuko se nunaró ηuya ηano yoroteto.”

¹⁴Asa simó ηuko unipare nanje, eneko koweye, sitúye moré. ηunde ηuro Yesuko uni nore kowenani ηunde tunoqaró. ηunde tunoqero

ⁱ 2:5 “sambo simó ” ηuko komo suki-suki Anutuko unipare kama yoriní tunoqi sambo simó yondowaró. Ko itaka enejo sunará teyoteŋgo. ^j 2:9 “samaka-samaka tuwó ” ηuko Anutu enejombo nore samaka yereyote. Kimoyó moré kini. ^k 2:11 “unipare meté horé ” ηuko oteteye soso muko meté nanje kini. ^l 2:11 “unipare meté horé” ηuro murí muko ηandiro, “Anutu koro unipare” nanje.

khumoroqo kindo khumowero koro wimbí ñu riní kini taró. Kindo khumowero koro wimbí ñuko Monimbu nanje. ¹⁵Naru rokóño khumowaño ñuro sasaro ñundoko unipare kondé sopo yereyote. Quko Yesuko wimbí ñu riní kini tiní sasaro ñu ñuya riní kini taró. ¹⁶Hamó, Yesuko sambo simó kama samaka yereyote. Kini, Abraham¹ koro usi-sí ñu nanje samaka yereyote. ¹⁷Ñunde ñuro topé-topémboro kiraróye qembe tunoqaró. Ñuro tero unipare sikíye te yunoro otete meté howero Anutu toñímo o qa-qa unindoro tapá unindoro^m kho ñu teweya. Tiní Anutuko uniparetoro quhuriye se rotoweya. ¹⁸O kate-kate qundo nore towo nereyote, ko o ñuko ene ñuya towonóni kowe surumí korowaró. Ñunde ñuroko okato nore towo nereyote quño ñuno enendo ñonóni tondañini samaka nereyote.

Yesuko Moses takate

3 ¹Uni topo meté horé, ye ñuya Anutuko sambo koñgo neko yereró mu, Yesu ñuro kondé ñoyi. Anutuko noko ñano asáñoní o qa-qa unindoro tapá uniⁿ tunoqaró, ñuro yesowoyoteto. ²Enendo Anutuko kho inaró ñu kama rotaró. Kini, Mosesko^o Anutu koro suwisawiyó soso keweroyemo kho taró ñunde qembe Yesuko khoyó taró. ³Qeni, uni kato pase meté ka towoníqo, pase ñuro mande meté mu yeyoteto, quko uni towaró ñuro seré parámi te inoyoteto. Asa ñundiro nanje Yesu koro owé parámi qundo Moses koro owé parámi ñu takate. ⁴Dokoro unindo pase towoyotenggo, quko Anutuko noko sambo towaró. ⁵Komo Mosesko Anutu koro suwisawiyó soso keweroyemo kho uni tunoqero kho ñu kama rotaró. Kini, kho tero enendo Anutuko o karo tukú yeweya quro yesowaró. ⁶Quko Kristoko^p nañuní tero Anutu koro suwisawiyó sopo yereyote. Ko norendo wimbí tero Anutuko o meté-meté mu nore nunoweya ñuro kondé sopowato tiníqo, noreko Anutu koro suwisawiyó yoteto.

Newondeye ma kusiyowero

⁷⁻⁸Ñunde ñuroko nore Yuqa Surumímboro mandí ñato. Ñande yete,

“Komo usi-siyembo mira wimbímo mira windu-windu tero towo nerero newondeye kondé kusiyangurí.

¹ 2:16 “Abraham” ñuko Juda uniparetoro pukoye. ^m 2:17 “o qa-qa unindoro tapá uni” ñundo *Ya Surumímo* hu-hariri sopoyangurí. Ñunde sopo kumima naru soso quroko naru kanata quño unipare soso koro quhuriyembo o qa-qa parámi ka taró. ⁿ 3:1 “o qa-qa unindoro tapá uni” ñundo *Ya Surumímo* hu-hariri sopoyangurí. Ñunde sopo kumima naru soso quroko naru kanata quño unipare soso koro quhuriyembo o qa-qa parámi ka taró. ^o 3:2 Komo suki “Mosesko” uni parámi tero Israel unipare sopo yereró. Anutuko *Sainai* purímo *hutuño* mande inoní mande ñu rondaqe unipare yunaró. ^p 3:6 “Kristo” ñuko Yesu nanje, asa Anutuko rokóñoní mahero wiri yerete uni parámi horé tunoqaró ñu.

- Asa itaka naru n̄ano ye Anutu maṅgó iṅoteṅgo tiníqo,
 usi-siyemboro oteteye howero newondeye ma kusiyowero.
 9 Mira wimbímo n̄uno kumima naru 40 n̄unde yate-yate towo niri
 kho wimbí tewe qeneṅgurí.
 10 N̄unde n̄uroko no unipare n̄uro kiro mande yero
 n̄ande yanowó, ‘Newondeyembo no kama iṅo nunoyoteṅgo.
 Neneṅgo khene kama howeyoteṅgo.’
 11 N̄unde n̄uro no saṅgirí tero mande kondé n̄ande yimiranowó,
 ‘Hamó horé ye neneṅgo imaṅe-imaṅe narune n̄uro quroko kama
 uyarewaṅgo.’”

12 Ye topo-topone, iṅo-iṅoye meté sopoyuri qembe. Ye keweroyemo kato iṅondutu piyimi ka newondímo yoní iṅondutuyó rotoro Anutu yoto-yotoyó moré n̄u huwóṅoweya koro. 13 Kini, Anutuko mande n̄uno n̄ande yaró, “Itaka naru n̄ano,” yaró. Ko naru n̄u kama kini taró, yote. Asa itaka ye epe rukiso-rukiso ti qembe. Quhurímbo kaná yiriní newondeye kondé kusiyowaṅgo koro. 14 Dokoro Kristo^a koya womoyoteto. Quko iṅondutu kondé koretero tatowó n̄u kondé kama towoyoteto tiníqo, eneya kama womoyoteto. 15 Mande n̄uko n̄ande yete,

“Komo usi-siyembo mira windu-windu tero
 newondeye kondé kusiyawaṅgurí.

Asa itaka naru n̄ano ye Anutu maṅgó iṅoteṅgo tiníqo
 usi-siyemboro oteteye n̄u howero newondeye ma kusiyowero.”

16 Dani kato Anutu maṅgó iṅoro mira windu-windu taṅgurí? N̄u unipare n̄u Mosesko yorero Isip noṅgo areṅgurí, hamómbe? 17 Ko Anutuko dani kaya saṅgirí teyoní kumima naru 40 n̄unde taró? N̄u unipare n̄uko o piyimi taṅgurí. Ko khumoyi ukúye mira wimbímo n̄uno yoraṅgo. 18 Ko Anutuko danimboro n̄ande yimiraró, “Hamó horé ye neneṅgo imaṅe-imaṅe n̄u quroko kama uyarewaṅgo?” N̄uko unipare mande wenda-wenda taṅgurí n̄uro yaró. 19 Asa ko n̄ande iṅoteto, unipare n̄undo iṅondutu kama tero imaṅe-imaṅe naruyó n̄uro quroko kama uyareṅgurí.

Anutu koro uniparetoro naru imaṅewero qu

4 1 Anutuko nore imaṅe-imaṅe naruyó n̄uro quroko uyarewero mande kusiyaró. N̄unde n̄uroko sasaro tato. Imemoṅgo keweronanimo kato arero yate n̄uro quroko n̄uno uyarewero mepémo kini koro. 2 Dokoro nore n̄uya usisamba n̄unde qembe piṅa mande meté n̄u iṅatowó. Quko usisambato mande n̄u kinanṅe iṅoro kama iṅondutuwoyaṅgurí. N̄unde n̄uroko mande n̄undo kama samaka yereró. 3 Hamó, nore

^a 3:14 “Kristo ” n̄uko Yesu nange, asa Anutuko rokóṅoní mahero wiri yerete uni parámi horé tunoqaró n̄u.

injonduwoyoteto qundo imaqe-imaqe naruyó ñuro quroko uyareteto. Anutuko imaqe-imaqe ñuro ñande yaró,

“Ñunde ñuro no sanjirí tero mande kondé yimiranowó,
‘Hamó horé, ye neneño imaqe-imaqene ñuro quroko kama
uyarewanngo.”

Ñunde quko nore ñande ijoteto, komo suki Anutuko noko sambo towoní khoyó kini tiní imaqe-imaqe naru hurí taró. ⁴Dokoro sokomeko ñande yaró, “Naru kande sanjyoro irisayómo ñuno Anutuko khoyó soso rotoro imaqaró.”^r ⁵Quko ñande ñuya yaró, “Neneño imaqe-imaqe narune ñuro quroko kama uyarewanngo.”^s

⁶Asa ko imaqe-imaqe naru ñuko yorote, ko unipare kumimboko ñuro quroko meté uyarewanngo. Komoko usisambato piña mande meté ñu ijoro wendaqeyanngurí. Asa ko ñuno kama uyarenggurí. ⁷Ñunde ñuroko tukú horé Dewitko^t Anutu koro manngó rero naru ka rokónjaró, asa “Itaka naru nanqe,” yero rokónjoro ñande yaró,

“Asa itaka naru ñano ye Anutu koro manngó ijotenngo tiníqo,
usi-siyemboro oteteye howero newondeye ma kusiyowero.”

⁸Dokoro komo Josuako usisambanani yoriní hamó imaqeyanngurí tiníqo, tukú Anutuko sokomeko naru meyowo karo kama yeweya, peka. Quko naru ñunde quro yaró. ⁹Asa ko Anutu koro uniparetoro Sapat naru^u ka yorote. ¹⁰Dokoro uni kato Anutu koro imaqe-imaqe naruyó ñuro quroko uyareroro, Anutuko taró ñunde qembe khoyó soso rotoweya. ¹¹Asa ko imaqe-imaqe naruyó ñuro quroko uyarewero quro kho kondé tato. Usisambato mandí wendaqeyanngurí ñu kheyé howero umbuwato koro.

¹²Dokoro Anutu koro mandí ñuko yoto-yotoyó moré, ko wimbí moré. Ñuko suke kawore-kawore mití moré ñunde qembe, mití manannga teyote. Mande ñuko uni quroko uro kapímboya yuqayómboya ko potó sombémboya pipuri wimbímboya toñoní kosangete. Ko newondenanimboya iño-iñonanimboya rondanewero wimbí moré. ¹³O soso Anutuko towaró ñu tunomo yuri toñímbo qeneyote. Noreño o soso ijomukote, ko naru kano otetenani ñuro murí yato iñoweya.

^r 4:4 Murí Tero 2:2 ^s 4:5 Hariri Yambo 95:11 ^t 4:7 “Dewit” - komo suki Dewitko Israel uniparetoro wiri yerete uni taró. Anutuko Dewit kondé iño inaró, ko yate-yate Israel unipare ñuyako Dewit kondé iño inanngurí. ^u 4:9 “Sapat naruko” ñuno Juda unipareto kho ka kama tanngurí. Kini, imaqeyanngo nanqe, dokoro naru kande sanjyoro irisayómo ñuno Anutuko khoyó riní kini tiní imaqaró.

Yesuko o qa-qa unindoro tapá uni parámi yote

¹⁴Asa norejo o qa-qa unindoro tapá uninani^v parámi ka yote, ko sambo kewerowore oró. Ijuko Yesu, Anutu koro Naḡuní. Ijunde njuro ijondutu yesowoyoteto nj kondé towato. ¹⁵Dokoro o qa-qa unindoro tapá uninanimbo norejo ijomukote. O kate-kate kaná-kaná murí-murí njundo nore towo yereyote nj takawero rukusuwoyoteto. Quko o kate-kate njuko o qa-qa unindoro tapá uninani nj njuya towonjaró, quko enendo quhurí ka kama taró. ¹⁶Ijunde njuroko newondenani rukisoyoya Anutu koro tanjímo oto. Iju nonjo samaka-samaka tuwó^w reyoteto. Ijunde oto Anutuko sikínani te yunoro nore samaka yereweya.

5 ¹Qeni, Anutuko uni soso keweroye monjo kanata ka rokójoní o qa-qa unindoro tapá uni tero unipare samaka yerewero quro Anutu tonjímo kho teyote. Kho njuko njandiro, enendo oka Anutu te inoyote, ko uniparetoro quhuríye rotowero quro o qa-qa tete. ²Enendo uni kumi ijo-ijoye moré kini quya uni Anutu koro khe rotoyotengo quya mande ime yero ronjaru yereyote. Dokoro ene njuya o kato towonoyote nj takawero rukusuwoyote. ³Iju murí njuro enejo quhuríyómboya unipare quhuríyemboya rotowero quro o qa-qa te inoyote. ⁴Ko uni ka enejombo o qa-qa unindoro tapá uni njuro owé qu rewero mepémo kini. Komo Anutuko Aron rokónoro owé nj inaró. Asa njundiro nanje Anutuko o qa-qa unindoro tapá uni soso owéye nj yunoyote.

⁵Asa Kristo^x njuya enejo owí hokoro o qa-qa unindoro tapá uni kama tunoqaró. Kini. Anutuko njande miraró,

“Ke nenejo naḡone.
Itaka kejo awanje teteno.”

⁶Mande kanjuya njande miraró,

“Ke Melkisetek njunde qembe
o qa-qa uni suki-suki yoroweya.”

⁷Komo Yesu nokono yora. Iju naruko njuno njande ye injaró, “Anutuko no meté rambaruru konjo noreweya.” Ijunde ye ijoro tendoro, kondé nekero, hariri parámi taró. Ko enejo ijoní umbuní iwí kusunoyómo yoníqo haririyó injaró. ⁸Yesuko Anutu koro naḡuní horé, quko quhurí korowaró. Ijunde tero Anutu koro manjó howewero otete nj ijomukaró.

^v 4:14 “o qa-qa unindoro tapá uni ” njundo *Ya Surumímo* hu-hariri sopoyanḡurí. Ijunde sopo kumima naru soso quroko naru kanata quno unipare soso koro quhuríyembo o qa-qa parámi ka taró. ^w 4:16 “samaka-samaka tuwó ” njuko Anutu enejombo nore samaka yerewote. Kimoyó moré kini. ^x 5:5 “Kristo ” njuko Yesu nanje, asa Anutuko rokójoní mahero wiri yerete uni parámi horé tunoqaró nj.

⁹Howeyate khoyó ñu soso kini taró. Asa ko eneñombo unipare soso eneño mañgó howeyotenggo ñu rambaruru koñgo yoriní suki-suki yorowañgo. ¹⁰Ko Anutuko rokóñoro ñande yaró, “Ke Melkisetek ñunde qembe o qa-qa unindoro tapá uni suki-suki yoroweya.”

Khe meté mu ma rotowero

¹¹Norendo iño-iño ñaro mande wata yimirowato, ye iñoteto. Quko rukusuwoteto, dokoro iño-iño ye muko kusiyowí, ko hiyóqewero mepémo kini. ¹²Dokoro ye komo iño-iño ñu rañgurí, quko itaka uni meyoowo wisiyo yimirowero mepémo kini. Hamó, ye Anutu koro o murí-murí ñuro kape tañgurí. Asa ko meté uni kato kañyua mande ñu yeño wisiyoweya. Ye oña qembe susu nanje neyotenggo, o kondé qu uni pará-parámbo neyotenggo ñu newero mepémo kini. ¹³Hamó, uni ka susu nanje neyote quko otete roneneñowí^y ñuro kama iñote, dokoro oña ñunde qembe tete. ¹⁴O kondé newero ñuko uni komo parámi tañgurí ñuro qu. Uni ñunde quko towo yerewero naru wata tunoqiníqo, o soso rondañero murí meté ko murí piyimi qene rondañeyotenggo.

6 ¹Ñunde ñuroko Kristo^z ñuro murí koretero iñatowó ñu sowe teya oña ñunde kini unipare parámi ñunde qembe tunoqato. Iño-iño korete qu sañano kañeyoteto ñuko ñandiro: otete piyimi tero khumowato quro newonde rohoréñowero murí, ko Anutuwoore iñondutu tewero murí, ²sonowowero murí, kandenani sañayemo rañowero murí, unipare khumañgurí qundo pitu ko otoqowero murí, ko mande khono kañero topé piyimi suki-suki rewero murí. ³Ko Anutuko wimbu nunoníqo, iño-iño ñu sowe tewato.

⁴⁻⁶Qeni, Anutuko uni kumi hiyó yunaró, ko uni ñundo puriño sambo koñgo umburó ñuro nuñgurí iñañgurí, ko Yuqa Surumí ñu rañgurí. Uni ñundo Anutu koro mandí ñuro nuñgurí iñañgurí, ko naru ketako ñano Yuqa koro wimbí rañgurí. Asa uni ñunde quko Anutu huwóñowañgo tiníqo, kañyua newonde rohoré tewero mepémo kini. Dokoro enendo Anutu koro Nañuní rero pitu ko tipiririko^a utoro nañuní ñuro yesaráñowañgo.

⁷Qeni, sono umbuyoní noko ka sono rero eñgé meté tiní unipare kho eñgé siyotenggo quno, Anutuko noko ñu puriño inote. ⁸Quko noko ka eñgé piyimi tero, asa utó kami-kamimboya komó piyimimboya nanje woteyoweya tiníqo, Anutuko noko ñuro piyimiñoro takuni sañanímbo reweya, peka. Ko naru weña quno^b tepo qaní kini teweya.

^y 5:13 “otete roneneñowí” ñuko Anutuko nore rokó yiriní noreño murínani eneño murí howeyote. ^z 6:1 “Kristo” ñuko Yesu nanje, asa Anutuko rokóñoní mahero wiri yerete uni parámi horé tunoqaró ñu. ^a 6:4 ^b 6:8 “naru weña” ñuko naru Kristoko pitu ko mahero unipare soso ronda yerero Anutuko o soso hamó wiriyooweya. (1 Tesalonaika 2:19; 5:23 koya 1 Korin 15:24-28 weyo qembe.)

⁹Topo hamó, oresaka mande ŋu yeteto, quko yeŋo ŋande iŋoyoteto, Anutuko ye rambaruru koŋgo yoriní meté yowaŋgo. ¹⁰Dokoro Anutuko otete roneneŋowí howeyote nanŋe, ye kho meté teyoteŋgo ŋuro kama kape teweya. Kini. Ye newonde meté Anutu inoro eneŋo unipareyó ŋu watí samaka yereyoteŋgo. ¹¹Norendo ŋande iŋoyoteto, ye kho wimbí teya Anutuko o meté te yunoweya ŋuro iŋoya naru weŋa ŋuro sopoyi qembe. ¹²Yeko wimbuma uni ma tunoqewero. Uni kumimbo iŋondutu kondé tero mondó ta kunditero Anutuko o meté yunowero ŋuro mande kusiyaró ŋu reyoteŋgo. Uni ŋu yiyoya eneŋo kheyehowi qembe.

Anutuko mande kusiyaró ŋu hamó howeweya

¹³Qeni, komo Anutuko Abraham^c koya mande kusiyaró. Quko mande date kondéraró? Oka kato Anutu takaro koreko kama yote. Ŋunde ŋuroko Anutuko eneŋo owímo mandí riní kondériní ŋande yaró, ¹⁴“Nondo puriŋo hamó kunowano, ko soweke yorewe hamó wata tewaŋgo.”^d ¹⁵Ŋunde yiní Abraham sopro mondó ta yotoro yate-yate Anutuko o ŋuro mande kusiyaró ŋu raró.

¹⁶Qeni, uni kato mandeye kondérewero^e quro eneŋo parámiyemboro owímo yeyoteŋgo. Ŋunde ti owé ŋundo mandeye riní kondériní uni kato mande ŋu riní umbuwero mepémo kini. ¹⁷Asa komo Anutuko mande kusiyoro, Abraham koro sowe qu hamó o meté te yunowano, yaró. Ŋunde yaró, ko iŋo-iŋoyó kama rohoréŋoweya. Ŋuro ene witú yerewero quro mande meyowo ŋu, asa, “Mande hamó horé yeteno,” yaró. Ko mande meyowo ŋundo mande kusiyaró ŋu riní kondéraró. ¹⁸Asa ko mande kusiyaró quya mande meyowo ŋuya irisa-irisa yote. Ko mande irisa quko mande enesó kama tunoqeweya, dokoro Anutuko mande kota yewero mepémo kini. Kini, mande irisa ŋuko nore rukiso yiriní sorero Anutu taŋgímo uyare sóqero mande kusiyo yunaró ŋuro eŋgé ŋu sopoyoteto.

¹⁹Eŋgé ŋu sopoyoteto ŋuko newondenani towoní kondéreyote. Eŋgé sopoyoteto ŋuko Ya Surumímo oro tuwí^f sumeyoro oro oka kondé towoní kama yukuwowato. Ŋunde tero norendo toŋero wimbo-wimbo kama uyarewato. ²⁰Koretero Yesuko nore samaka yerewero tuwi parámi sumeyoro oró. Dokoro enendo o qa-qa unindoro tapá uni ka Melkisetek kiraró tunoqaró. Ko eneko o qa-qa unindoro tapá uni ŋunde qembe suki-suki yoweya.

^c 6:13 “Abraham” ŋuko Juda uniparetoro pukoye. ^d 6:14 Murí Tero 22:17 ^e 6:16 Ŋu naruko ŋuno uni kato eneŋo mande kusiyaró ŋu kondérewero quro mande kaŋuya yaró. Mande kaŋuya ŋuko eneŋo mandí wimbí inoní uni meyowo ŋande ye iŋowaŋgo, peka, “Enendo mande hamó nanŋe yete.” ^f 6:19 “tuwi” ŋuko *Ya Surumí* quroyómo Wembó Surumí koya Wembó Surumí Horé keweroyarimo yora (Toŋeŋguri 26:31-33; 40:21 weyo qembe). Juda unindo ŋande ye iŋaŋguri, ko Wembó Surumí Horé muno ŋuno Anutuko kunditeyara, quko tuwi ŋuko wisumunaró, unipareto owero mepémo kini.

Melkisetek ŋuro yaró

7 ¹Qeni, Melkisetek, Salem yendé ŋuro wiri yerete uni qu, eneko Anutu Koreko Horé yote quro o qa-qa uni.⁸ Komo Abrahamko^h kuma tero wiri yerete uni yuroní khumoyi ene rohoréŋoro eneŋo yendéyómo uyaró. Uyarini Melkisetek kheko wisumuŋoro puriŋo inaró. ²Ŋunde inoní Abrahamko situwi kuma koŋgo siyaró ŋu soso rondaŋini kande irisa tini kanata rero Melkisetek inaró.ⁱ Asa owé, “Melkisetek,” ŋuro murí muko ŋandiro, otete roneneŋowímboro wiri yerete uni. Ko owé, “Salem,” ŋuro murí muko ŋandiro, newonde ime. Ŋundiro nanŋe Salem koro wiri yerete uni ŋundoko newonde ime ŋuro wiri yerete uni. ³Melkisetek iwí-nimí moré kini, ko usisambayó moré kini. Nimímbo pisiyaró ŋuro naruyó ŋu kama iŋoyoteto, ko khumaró ŋuro naruyó ŋu ŋuya kama iŋoyoteto. Eneko Anutu koro Nanjuni ŋunde qembe yorote. O qa-qa uni suki-suki yoweya.

⁴Ye Melkisetek iŋo inoyi qembe, eneŋo owí parámi tete. Dokoro noreŋo usinani korete qu Abrahamko o meté-meté mu kuma koŋgo siyaró ŋu rondaŋini kande irisa tini kanata re Melkisetek inaró. ⁵Itaka Liwai^j koro sowe kumimbo o qa-qa kho teyotenggo. Liwai uni ŋuya Israel uni meyowo ŋuya soso Abraham koro usi-sí. Quko hutuŋo mande^k kako ŋande yete, ko Israel unindo ononŋoye rondaŋi kande irisa tini kanata re topo-topoye Liwai uni ŋu yunowango. ⁶Asa Melkisetek ŋuko Liwai koro sowe qu kini. Quko Abraham, uni Anutuko mande kusiyo inaró ŋu, situwi sombé ŋu Melkisetek inaró. Inoníqo, Melkisetekiko puriŋo inaró. ⁷Ko mande ŋako hamó nanŋe, uni puriŋo rete ŋuko uni puriŋo inote ŋuro kusunŋoyómo yote. ⁸Liwai koro sowe qu, uni hamó khumowango qu, Israel koro o kanata ŋu siyoyotenggo. Quko Melkisetek Abraham koro o kanata ŋu raró, ko sokomeko ene khumaró quro kama yete. ⁹Ŋandiro meté yewato, peka, Liwai, uni o kanata ŋu siyoyote ŋu eneŋombo usi-sí Abraham kandíwore o kanata ka Melkisetek inaró. ¹⁰Dokoro ene kama tunoqeyoní Melkisetekiko Abraham kheko kopariyó, quko ŋu naruko ŋuno Liwaiko usímboro kowímo yora.

Yesuko Melkisetek ŋunde qembe tete

¹¹Anutuko hutuŋo mande^l unipare yunoro Liwai koro sowe qu kumi rokó yirini o qa-qa kho ŋu teyotenggo. Quko o qa-qa^m ŋunde qundo unipare

⁸ 7:1 “o qa-qa uni” ŋunde quko númbowe rero uroní khumoní anutu ka te inoyote.

^h 7:1 “Abraham” ŋuko Juda uniparetoro pukoye. ⁱ 7:2 Sowo mande ŋaro Murí Tero 14:17-24 weyo qembe. ^j 7:5 “Liwai” ŋuko Yakop koro nanjuni. Yakop koro owí kako “Israel”.

^k 7:5 “hutuŋo mande” ŋuko komo suki Anutuko Sainai purímo Moses inoní Israel unipare yunaró. Mande ŋuko Juda uniparetoro yoto-yotoye soso sopoyaró. ^l 7:11 “hutuŋo mande” ŋuko komo suki Anutuko Sainai purímo Moses inoní Israel unipare yunaró. Mande ŋuko Juda uniparetoro yoto-yotoye soso sopoyaró. ^m 7:11 “o qa-qa” ŋunde qu unipareto Anutu iŋoro potoruku te inoro nú-qare ka o qa-qa uni inoyi uroní khumoní wondo yakutímo ŋuno qaró.

yoriní meté horé kama teyaᅅgurí. 12Junde ɲuroko sokomeko ɲuno o qa-qa uni keta qu Aron qembe kini, Melkisetek ɲunde qembe tunoqeweya ɲuro yaró. 13Qeni, wini kato kinaᅅge Liwai koro sowe qu mepéye rero o qa-qa kho tewero mepémo kini. Kini, hutuᅅo mande ɲu rohoréɲoyika mepéye rewango. 14Hamó, sokomeko uni keta qu tunoqeweya ɲuro yete ɲuko Liwai koro sowe qu kini, Israel koro naᅅo-simó meywomboro sowe qu ka. Ko eneᅅo wini qu kato wondo yakutímo o qa-qa kama teyara. 15Dokoro ɲande iᅅomukoteto, Uni Paráminani ɲuko Juda koro sowe qu noᅅgo tunoqaró. Ko Moses koro hutuᅅo mandeko o qa-qa kho ɲu Juda koro sowe qu kama yunaró.

15Ko o qa-qa uni keta qu Melkisetek qembe tunoqeweya tiníqo, mande itaka yeteto ɲa hamó wisiyoweya. 16Dokoro enendo usisambatoro owéye ɲuro hutuᅅo mande kawore khayó ɲu kama raró. Kini eneᅅo yoto-yoto suki-suki yoweya quwore kho ɲu raró. 17Dokoro sokomeko ɲande yete,

“Keto Melkisetek ɲunde qembe
o qa-qa uni naru suki-suki yoweya.”

18Qeni, mande kondé komo qu ɲuko wimbí moré kini, nore samaka yerewero mepémo kini. 19Junde ɲuroko riní kini taró. 19Dokoro hutuᅅo mande ɲundo oka riní meté horé kama taró. Asa ko khe keta qu tunoqaró. Tunoqero hutuᅅo mande komo quⁿ ɲu takate, dokoro ore keta ɲuwore o meté siyoro Anutu taᅅgímo uyarewato.

20Asa Anutuko eneᅅo owímo mande wimbí moré qu yero Yesu o qa-qa kho inaró. Hamó, o qa-qa uni meyoowo ɲu kinaᅅge khaye raᅅgurí. 21Quko Yesu kho ɲu inoro mande wimbí moré qu ɲande yaró,

“Uni Parámimbo eneᅅo owímo mandí ɲu riní kondériní
mande ɲu kama rohoréɲoweya.

Keto o qa-qa uni naru suki-suki yoweya.”

22Junde ɲuro nore iᅅoteto, Yesuko mande kondé riní tunoqaró ɲundo mande kondé komo qu takate.

23Komo o qa-qa uni enesó-enesó qambu tunoqᅅgurí. Kanata kato kho teyate khumoní meyoowo kato mepé raró. Asa naru rokóᅅoro ɲunde naᅅge teyaᅅgurí. 24Quko Yesuko suki-suki yoweya. 25Junde ɲuroko o qa-qa unindoro kho qu suki-suki teweya. 25Asa ko enendo unipareto enewore Anutu taᅅgímo uyareyotᅅgo ɲu meté rambaruru koᅅgo yoriní suki-suki yowango. Dokoro naru rokóᅅomo yotoro Anutu kirayoní samaka yereyote.

ⁿ 7:19 “mande kondé komo qu” ɲuko *hutuᅅo mande* naᅅge, komo suki Anutuko *Sainai* purímo ɲuno *Moses* inoní Israel unipare yunaró.

²⁶Hamó, o qa-qa unindoro tapá uni^o nunde qundo mepémo nore samaka yereyote. Dokoro Anutu koro murí howeyote, potó moré kini, Anutu tonjimo sara horé yote, quhurí uni nuro sewemo yote. Ko samboko owé parámi horé raró. ²⁷Komo, naru rokóro o qa-qa unindoro tapá unindo enejo quhuríye rotowero quro o qa-qa teroqota uniparetoro quhuríyembo o qa-qa teyanggo. Quko Yesu nundoko nunde kama teyote. Kini. Naru kayata nanje norejo quhurínani soso rotowero quro enejombo kowí rero Anutu te inaró. ²⁸Qeni, komo hutujo mandeko uni wimbuye moré kini nju o qa-qa kho teyara. Tukú Anutuko mande ka riní wimbí tiní kho nju Nanjúní inaró. Ko Nanjúní njuko uni meté horé tero suki-suki yoweya.

Mande kondé keta quro o qa-qa unindoro tapá uni

8 ¹Mande yeteto nuro murí njuko nandiro. Uni nunde quko norejo o qa-qa unindoro tapá uninani tunoqaró, ene wiri yerete uni parámi horémboro kandí kondésina^p samboko kunditaró. ²Huru-huru koro Tuwi Yamaru^q hamó njuno kho teyote. Yamaru hamó njuko unindo kama towangurí. Kini. Uni Parámi enejombo towaró.

³Hamó, o qa-qa unindoro tapá uni^r soso khoye tero o Anutu te inoro o qa-qa tangurí. Asa ko Yesu njuya khoyó tero oka rero te inaró. ⁴Njunde njuroko enendo nokono yote tiníqo, o qa-qa uni kama yoweya. Dokoro, pukoyó meywomboro sowe qundo hutujo mande^s howero o qa-qa teyotenggo. ⁵Uni njundo Anutu koro pase njuno o qa-qa kho teyotenggo. Quko nju pase njuko pase horé samboko yote nuro rokóro nunde nanje. Komo Moses Anutu koro pase ka towowero taró quno njuno Anutuko njande miraró, “Ke rokó nju mira purímo wítú kerenowó nju okeyá ta howero tuwi yamaru towo qembe.”^t ⁶Quko Yesuko o qa-qa kho ka raró, kho njuko o qa-qa uni meywomboro khoye nju takate. Dokoro enendo mande kondé ka sopoyote, ko mande kondé nuro keweroko uni tunoqaró. Mande kondé keta njundo mande kondé komo qu nju^u takate. Dokoro Anutuko noreya mande kusiyaró. Ko mande kusiyote njundo mande komo kusiyoro yunaró nju takate.

^o 7:26 “o qa-qa unindoro tapá uni ” njundo *Ya Surumímo* hu-hariri sopoyangurí. Njunde soporo kumima naru soso quroko naru kanata quno unipare soso koro quhuríyembo o qa-qa parámi ka taró. ^p 8:1 Uni owé parámi moré nju nanje wiri yerete uni kandí kondésina nunde kunditangurí. ^q 8:2 “Huru-huru koro Tuwi Yamaru” nju Israel unindo Anutu koro mandí howero mira wimbímo njuno tuwi yamaru towo quroko njuno hu-hariri teyangurí. ^r 8:3 “o qa-qa unindoro tapá uni ” njundo *Ya Surumímo* hu-hariri sopoyangurí. Njunde soporo kumima naru soso quroko naru kanata quno unipare soso koro quhuríyembo o qa-qa parámi ka taró. ^s 8:4 “hutujo mande ” njuko komo suki Anutuko *Sainai* purímo *Moses* inoní Israel unipare yunaró. Mande njuko Juda uniparetoro yoto-yotoye soso sopoyaró. ^t 8:5 Tonjangurí 25:40 ^u 8:6 “mande kondé komo qu” njuko *hutujo mande* nanje, komo suki Anutuko *Sainai* purímo njuno *Moses* inoní Israel unipare yunaró.

⁷Qeni, ko mande kondé korete ηundo meté horé taró tiníqo, asa Anutuko mande kondé kaηuya kama teweya. ⁸Quko uniparetoro quhuríye rihimoro ηande yaró,

“Uni Parámimbo ηande yete,

‘Qeni, imemoηgo ta
mande kondé keta qu Israel koro wini quya
Juda koro sowe quya tewano.

⁹Komo Isip noηgo usi-siye kandeyemo yondoworo mahenowó.
ηu naruko ηuno eneya mande kondé ka tanowó.

Quko mande kondé keta ηako
komo quro kiraró qembe kini.
Dokoro usi-siyembo neneηo mande kondé ηu kama howaηgurí.
ηunde tiqo, huwó yerenowó.

¹⁰Mande kondé keta ηa imemoηgo
Israel uniparetoya tewano ηuko ηandiro:
Neneηo hutuηo mandene rero iηo-iηoyemo rewano,
mande ηu rero newondeyemo nakayáηowano.

Nondo eneηo Anutuye yowano,
enendo neneηo uniparene yowaηgo.

¹¹Ko uni kato topoye iηo-iηo rondaqe yunoro
ηande kama yewaηgo, “Uni Parámimboro ηa iηo inoyi.”
Kini, uni owéye moré kini quya uni owéye moré qu,
asa, unipare soso ηundo niyoro iηowaηgo.

¹²Dokoro, otete piyimi teyoteηgo ηuro sikíye te yunoro
quhuríye se rotoro ηuro pitu ko kama iηowano.”

¹³Anutuko mande kondé keta karo yaró. ηunde yero mande kondé korete qu riní kina yote. Ko mande kina yote ηundo waka ta kini teweya.

Tuwi yamaruko ηuno hu-hariri teyaηgurí

9 ¹Asa mande kondé korete quno^v ore mande enesó-enesó yora.
Yambo hariri ηuro oreyé yora, ko Anutu koro pase nokono towowero ηuro oreyé yora. ²Tuwi yamaru pase qembe toworo quroyómo wembó ka towaηgurí. ηuno hiyómboro piko-piko koya o rewero yakutí kaya bret Anutu toηímo yorote ηuya ηuno se rotaηgurí. ηu pase ηuro wembó ηuko ηande ye nekaηgurí, “Wembó Surumí,” yaηgurí. ³Wembó ηuro keweroko tuwi ka porowaηgurí, ko tuwi ηu tupurísínako pase ηuro

^v 9:1 “mande kondé korete qu” ηuko *hutuηo mande* nange, komo suki Anutuko *Sainai* purímo ηuno *Moses* inoní Israel unipare yunaró.

wembó kanjuya yora. Ŋuro ŋande nekoyango, “Wembó Surumí Horé,” yangurí. ⁴Pase ŋuro wembóko ŋuno wondo yakutí ka” golpo towangurí mu ŋuno yora. Ŋuno oka nuŋgurí meté mu qayanjo. Wembó ŋuno ŋuya mande kondémboro sosoko ŋu yora. Golpo sosoko ŋu soso wehejaró. Sosoko quroko ŋuno kumbe gol ŋuya usú kaya wondo sarara irisa ŋuno yorawangurí. Asa kumbeno ŋuno mana kumi yora. Usú ŋuko Aron koro usú qu, komo kinaŋge sisani ŋuno wotaró. Ko wondo sarara irisako ŋuno komo Anutuko mande kondé ŋu nakayáŋaró. ⁵Ko Anutu koro sine parámíyómboro sambo simó^x koro kapo-kapo irisa towangurí. Kapo-kapo ŋundo sosoko saŋanímó yotoro wireyari romaróŋoro sosoko makoyó pokamariyó. Sosoko makono ŋuno uniparetoro quhuríyemboro kimo taró. Ŋunde quko itaka nondo o soso ŋuro murí kama yewano.

⁶O soso ŋu towoyi kini tiní naru rokóŋoro o qa-qa unindo wembó korete quno oro khoye teyangurí. ⁷Quko o qa-qa unindoro tapá unindo naŋge wembó quroko horé quno ŋuno oró. Naru rokóŋoro kama oyara. Kini, kumima naru soso quroko kosa naru kanata quno sitú ka se oró. Ŋunde se oro enemboya uniparetoya kumima naru quroko ŋuno kape tero o piyimi teyangŋo ŋuro o qa-qa tero Anutu te inaró. ⁸Asa ko ŋu murí ŋuwore Yuqa Surumímbo oka nore witú yerete. Ŋuko ŋandiro, Huru-huru koro Tuwi Yamaru^y korete qu ŋu yoraró quno ŋuno Wembó Surumí Horé quroko owero khe ka tunomo kama tunoqa. ⁹Ko ŋuko norenjomboro tapara mande ŋunde qembe. Ŋuko ŋandiro, uni kato oka te inoyotengŋo ŋuko eneŋo otete sopowero quro iŋo-iŋoye ronŋaruwowero mepémo kini. ¹⁰Kini, ore mande ŋuko kowenanimbora naŋge yaró, asa do ka newato, ko do sono ka newato, ko date kowenani sonowowato. Ŋu mande ŋuko wimbí moré, quko yate-yate naru keta itaka tunoqíníqo, ŋu kini taró.

Yesu koro sitú ŋuro yaró

¹¹Quko Kristoko^z o meté tunoqaró ŋuro o qa-qa unindoro tapá uni taró. Dokoro enendo Anutu koro pase kekere qu meté horé muno ŋuno kho teyote. Pase ŋuko noko koro qu kini, kandeto kama towangurí. ¹²Meme sitúnjomboya makao simó sitúnjo siyoro ŋuno kama oró. Kini, eneŋo sitúnjombo quhurínani kimo temukoní suki-suki meté yoroteto ŋu siyoro Wembó Surumí Horé quno ŋuno oró. ¹³Hamó, komo unipareto

^w 9:4 “wondo yakutí” ŋuko o qa-qa unindo ŋu yakutímó ŋuno o qa-qa tangurí.

^x 9:5 “sambo simó” ŋuko komo suki-suki Anutuko unipare kama yoriní tunoqi sambo simó yondowaró. Ko itaka eneŋo sunará teyotengŋo. ^y 9:8 “Huru-huru koro Tuwi Yamaru” ŋu Israel unindo Anutu koro mandí howero mira wimbímó ŋuno tuwi yamaru toworo quroko ŋuno hu-hariri teyangurí. ^z 9:11 “Kristo” ŋuko Yesu naŋge, asa Anutuko rokóŋoní mahero wiri yerete uni parámi horé tunoqaró ŋu.

Anutu tonjimo pusú^a tiqo, o qa-qa unindo meme sitúnjomboya makao urumuni sitúnjomboya makao pare qamukoyi nombo tunoqaró ñuya somo siyoro rañoní unipare sañayemo uró. Ñunde tero pusú ñu sowoyi koweye sara-sara tiní Anutu koro unipare tunoqañgurí. ¹⁴Quko Kristo koro sitúnjombo sitú meyowo ñu takate. Eneko potó moré kini horé taró. Ko eneño Yuqayó suki-suki yote qundo eneño rero Anutu o qa-qa ñunde te inaró. Eneño sitúnjombo meté noreño otete sopowero quro iño-iñonani hamó sonowoyote. Ñunde sonoworo otete piyimi tero khumowato ñu se rotoní Anutu yoto-yotoyó moré ñuro kho qu tewato.

¹⁵Ñu murí ñuro Kristoko mande kondé keta ñu sopoyote, ko uni keweroko uni tunoqaró. Ñuro tero Anutuko unipare neko yereró ñundo mande kusiyaró qu reyotenggo. Ko mande kusiyaró ñuko ñandiro, yoto-yoto suki-suki rewango. Komo unipareto mande kondé komo qu^b wendaqero quhurí tañgurí. Quko Kristoko khumoro quhuriye kimo tero quhurímbo kusi yereró ñu orosoyaró. Ñuro tero ye yoto-yoto suki-suki ñu rewango.

¹⁶Qeni, uni kato, imemongo khumowano, yero inoyote quno ñuno, ononoyó qene iñoro dando siyoweya ñuro mande kondé ka nakayáñoweya. Quko uni siyoweya ñuko kinange kama siyoweya. Kini, koretero unipareto ñande qene inowango, simburí ñu hamó khumaró. ¹⁷Dokoro simburí kama khumoníqo, mande kondé ñu wimbí moré kini. Enendo tonj yoníqo mande ñu kina yote.

¹⁸Ñu murí ñuro komo unipare makao uri khumoní sitúnjo hausuworo Anutu koro mande kondé komo qu kusiyañgurí. ¹⁹Qeni, ñu naruko ñuno Mosesko Israel unipare soso hutujo mande^c koro mande kondé soso yesowo yimiraró. Yesoworo makao simó sitúnjomboya meme sitúnjomboya sono koya rohoréñaró. Rohoréñoro tuwi mandumi ka hisop^d koro kambinímo kusiyoro riní sitúko uro sitú siyoní kuriyoní sitú ñuko sokome sañano ñuya unipare sañayemo ñuya uró. ²⁰Ñunde tero ñande yimiraró, “Anutuko mande kondé yeya kusiyote. Ko sitú ñako mande kondé ñu riní hurí tete.”^e ²¹Ñunde yero Mosesko sitú somo rañoní Anutu koro paseno ñuya kondó soso quroyómo yaró quno ñuno ñuya uró. ²²Hamó, hutujo mande ñundo ñande yete, sitú somo rañoka o kumi siyoní sara

^a 9:13 Anutu koro sokomeko ñande yaró, ko o kate-kate Anutu tonjimo pusú yora, ko uni ka murí kate-kate taró qundo pusú tunoqaró. Asa ko Juda unindo ñande yañgurí, ko uni ka murí pusú ñunde qu tarómbe ma o pusú ka towaró qundo Anutuko kutaqe ñuno uyarewero mepémo kini. Koretero enendo o qa-qa tero sara tunoqeroqota kutaqe ñuno meté uyareweya. ^b 9:15 “mande kondé komo qu” ñuko *hutujo mande* nange, komo suki Anutuko *Sainai* purímo ñuno *Moses* inoní Israel unipare yunaró. ^c 9:19 “*hutujo mande*” ñuko komo suki Anutuko *Sainai* purímo *Moses* inoní Israel unipare yunaró. Mande ñuko Juda uniparetoro yoto-yotoye soso sopoyaró. ^d 9:19 “hisop” ñuko te kunzi ka. ^e 9:20 Tonjengurí 24:8

teweya. Ko oka uroyi khumoní sitúŋo kama windoroŋoyiqota, Anutuko uniparetoro quhuríye kama se rotoweya.

Yesu khumaró ŋundo noreŋo quhurínani se rotaró

²³Ŋunde ŋuroko sitú ŋundo Anutu koro pase ŋu riní sara taró. Quko pase ŋuya o soso ŋu quroko yaró ŋuya o hamó samboko yoteŋgo ŋuro kapo-kapo naŋge. Asa ko o qa-qa meté horémbo o hamó samboko yoteŋgo ŋu riní sara taró. ²⁴Dokoro Kristo^f khumoro pitu ko otoqaró quno pase kandeto towaŋgurí quno ŋuno kama oró. Dokoro pase ŋuko o hamó samboko yote ŋuro kapo-kapo naŋge. Kini, enendo samboko oro itaka nore samaka yerewero Anutu toŋímo kaŋeyote.

²⁵Komo, o qa-qa unindoro tapá unindo kumima naru kanata-kanata meyowomboro sitúye siyoro Wembó Surumí Horé quno ŋuno oyaró. Quko Kristoko ŋundiro kama taró. Eneko naru qambu eneŋo sitúŋo kama te inoyara. ²⁶Dokoro otete ŋunde qu howaró tiníqo, komo suki qu noŋgo arero itaka ŋuya naru qambu kowe surumí korowoyote. Quko ŋunde kini. Itaka, naru weŋa ŋano, enendo tunoqero naru kanata naŋge eneŋo te inoní Anutuko uniparetoro quhuríye soso riní kini taró. ²⁷Unipare soso naru kanata naŋge khumowaŋgo. Khumoro Anutu toŋímo mande khono kaŋewato. ²⁸Ŋunde naŋge Kristoko naru kanata naŋge eneŋombo Anutu te inoní unipare qambu koro quhuríye se rotaró. Ko pitu ko nokono maheweya quno ŋuno quhurí kama se rotoweya. Kini, ŋu naruko ŋuno unipare ene sopoyoteŋgo ŋu soso rambaruru koŋgo yoreweya.

10 ¹Qeni, hutuŋo mande^g ŋuko o meté imemoŋgo tunoqewero ŋuro yoŋoyó naŋge. Ko naru rokóŋoro unipareto huruworo yambo hariiri tiqo, o qa-qa unindo hutuŋo mande ŋu howero naru rokóŋoro o qa-qa^h teyoteŋgo. Quko o qa-qa ŋundo unipare yoriní meté horé tewero mepémo kini. ²O qa-qa ŋunde qundo unipare yoriní hamó meté tewaŋgo tiníqo, o qa-qa kaŋuya kama tewaŋgo. Dokoro o qa-qa komo taŋgurí qundo yoriní sara tero newondeyemo ŋande iŋowaŋgo, nore itaka quhurínani moré kini peka. ³Quko ŋunde kini. Kumima naru rokóŋoro o qa-qa ŋunde qundo quhuríye riní tunomo tiní iŋoyawaŋgo naŋge, ⁴dokoro makao sitúŋomboya meme sitúŋomboya quhurínani sowowero mepémo kini.

⁵Ŋunde ŋuroko Kristokoⁱ nokono mahero Anutu ŋande miraró,

“O qa-qa ŋuya oka te kunowero ŋuro kama iŋoyara.

^f 9:24 “Kristo ” ŋuko Yesu naŋge, asa Anutuko rokóŋoní mahero wiri yerete uni parámi horé tunoqaró ŋu. ^g 10:1 “*hutuŋo mande* ” ŋuko komo suki Anutuko *Sainai* purímo *Moses* inoní Israel unipare yunaró. Mande ŋuko Juda uniparetoro yoto-yotoye soso sopoyaró.

^h 10:1 “*o qa-qa* ” ŋunde qu unipareto Anutu iŋoro potoruku te inoro nú-qare ka o *qa-qa uni* inoyi uroní khumoní *wondo yakutímo* ŋuno qaró. ⁱ 10:5 “*Kristo* ” ŋuko Yesu naŋge, asa Anutuko rokóŋoní mahero wiri yerete uni parámi horé tunoqaró ŋu.

Quko keto kowene roŋgaruworu nunaró.

⁶ O qa-qa qamukotenŋo ŋuya quhurí rotowero quro o qa-qa ŋuya keto ŋuro kama metéŋoyara.

⁷ Ko ŋande yanowó, ‘Anutu, qeno, no maheteno.

Komo sokomeko neneŋo nakayáŋŋurí.

Keŋo iŋo-iŋoke howewero quro maheteno.”

⁸ Asa qeni, enendo ŋande yaró, “O qa-qa ŋuya oka te kunowero ŋuya o qa-qa qamukotenŋo ŋuya quhurí rotowero quro o qa-qa ŋuya ŋuro kama iŋoyara, ŋuro kama metéŋoyara.” (Quko unipareto hutuŋo mande howero o qa-qa ŋunde qu taŋŋurí.) ⁹ Asa imemoŋgo ŋande yaró, “Qeno, no keŋo iŋo-iŋoke howewero quro maheteno.” Ŋunde tero mande kondé komo qu^j ŋu rotoro mande kondé keta qu riní mepé raró. ¹⁰ Yesu Kristoko Anutu koro iŋo-iŋoyó howero naru kanata naŋge eneŋo kowí rero o qa-qa taró. O taró ŋuwore nore noriní unipare meté horé^k tatowó.

¹¹ Naru rokóŋoro o qa-qa unindo kaŋero khoye tero o qa-qa ŋunde naŋge teyotēŋgo. Quko o qa-qa ŋundo uniparetoro quhuríye se rotowero mepémo kini. ¹² Quko Kristoko o qa-qa kanata naŋge tero quhurínani soso se rotaró. Ŋunde tiní kini tiní Anutu koro kandí kondésina^l kunditaró. ¹³ Kunditero, yate-yate Kristo Anutuko eneŋo saŋgiríŋo yorero kasiramo reweya ŋuro sopoyote. ¹⁴ Asa naru kanata ŋuno enendo o qa-qa Anutu te inoroŋo unipare meté horé tunoqeyotēŋgo ŋu yoriní meté horé suki-suki yowaŋgo.

¹⁵ Yuqa Surumí ŋundo noreno mande ŋande yesowoyote. Koretero ŋande yete,

¹⁶ “Uni Parámimbo ŋande yete, ‘Imemoŋgo nondo mande kondé keta qu yeya tewano.

Neneŋo hutuŋo mandene rero newondeyemo rewano, mande ŋu rero iŋo-iŋoyemo ŋuya nakayáŋŋowano.

¹⁷ No quhuríye ŋuya otete piyimi teyotēŋgo ŋuya ŋuro kaŋuya kama iŋowano.”

¹⁸ Asa ko Anutuko quhurí se rotoní kini taró quuno ŋuno, quhurí rotowero ŋuro o qa-qa tewero murí ŋuya kini taró.

Quhurí korowoya kondé kaŋi qembe

¹⁹ Uni topo, Yesu khumoní sitúŋombo umburo quhurínani se rotaró. Ŋunde tero nore rukiso yiriní Wembó Surumí Horé quuno ŋuno owato.

^j 10:9 “mande kondé komo qu” ŋuko *hutuŋo mande* naŋge, komo suki Anutuko *Sainai* purímo ŋuno *Moses* inoní Israel unipare yunaró. ^k 10:10 “unipare meté horé” ŋuko oteteye soso muko meté naŋge kini. Kini, owé ŋu “unipare meté horé” ŋuro murí muko ŋandi, “Anutu koro unipare” naŋge. ^l 10:12 Uni owé parámi moré ŋu naŋge wiri yerete uni kandí kondésina ŋunde kunditaŋŋurí.

²⁰Eneño kowí ñuko tuwi parámi^m ñu Wembó Surumí Horé ñuro makoyó wisumuñaró ñunde qembe. Asa khumoro khe keta yoto-yotoyó moré Wembó ñuro quuroko ñuno owero qu roñgaruwaró. ²¹O taró ñundo nore rukiso yereyote, ko o qa-qa unindoro tapá uni parámi kato Anutu koro unipare sopo yereyote. ²²Yesuko sitúño somo rañoní otete sopowero quro iño-iñonani piyimi muno uró. Uro ñundo riní sara-sara taró. Ko nore sono metémo kowenani sonowatowó. Ñunde ñuroko newonde hamó teya kondé iñondutuwoya Anutu tanjímo uyareto.

²³Anutuko, imemoneño o meté yunowano, yaró, ko o soso yaró ñu hamó horé tunoqeweya. Ñunde ñuroko iño-iño ñu kondé towoya ñuro yesowato. ²⁴Ko ñande ye iñowato, norendo date uni toponani rukiso yeretoqota topo-topoye newonde meté yunato otete meté nanje tewango. ²⁵Hamó, Anutu koro unipare kumimbo huruwowero piyimiñoteneño. Quko ñunde ma tewero. Nore iñoteto, Yesu mahewero naruyó tukuni tete. Ñunde ñuro meté huruworo newondenani rukisoyoro yorowato.

²⁶Qeni. Nore Anutu koro mande hamó ñu iñoteto, quko mande ñu huwóñoro o piyimi teyoteto tiníño, o qa-qa quhurínani sowowero qu ka tewero mepémo kini. ²⁷Kini, Anutu koro sangirí nanje yoroní enendo uni ñunde qu topé piyimi yunoní te suru kondé ñundo yoqaweya. Nore ñuro sasaro teyoteto. ²⁸Komo, uni kato Mosesⁿ koro hutuño mande ñu wendaqiní uni irisape ma kapusa o piyimi ñu qenero mande yesowoyangurí tiníño, unipareto uni ñuro sikí kama te inangurí. Kini, uroyi khumaró.

²⁹Qeni, naru kano uni kato Anutu koro Nañuní khete rumuniñoyote, ko sitúño mande kondé keta qu riní kondériní nore noriní unipare meté horé tatowó ñu huwóñoyote, ko Yuqapo nore samaka yereyote ñu yesaráñoyote. Asa ñunde teweya tiníño, do ka tunoqeweya? Anutuko uni ñu topé piyimi horé te inoweya. ³⁰Dokoro ñande iñoteto, Anutuko ñande yaró, “Quhurí topé tewero ñuko neneño kho qu. Nondo quhurímboro topé tewano.”^o Ko ñande ñuya yaró, “Uni Parámi eneñombo nanje unipareyó ronda yereweya.”^p ³¹Anutu yoto-yotoyó moré ñuro kandímo umbuwero ñuro sasaro parámi ti qembe.

³²Ye komo Anutuko hiyó yunará ñuro iñoyuri. Ñu naruko ñuno ye quhurí qambu koroworo kondé kañangurí. ³³Naru kumimo uni piyimimbo huwó mande ye yunoro yorero unipare toñeyemo yoroti kañi

^m **10:20** “tuwi” ñuko *Ya Surumí* quroyómo Wembó Surumí koya Wembó Surumí Horé keweroyarimo yora (Toñangurí 26:31-33; 40:21 weyo qembe). Juda unindo ñande ye inangurí, ko Wembó Surumí Horé muno ñuno Anutuko kunditeyara, quko tuwi ñuko wisumuñaró, unipareto owero mepémo kini. ⁿ **10:28** Komo suki “*Mosesko*” uni parámi tero Israel unipare sopo yereró. Anutuko *Sainai* purímo *hutuño mande* inoní mande ñu rondaque unipare yunará. ^o **10:30** Hutuño Mande 32:35 ^p **10:30** Hutuño Mande 32:36; Hariri Yambo 135:14

o piyimi te yunangurí. Ko naru kumimo ye topoyembo quhurí njunde qu korowanurí nu samaka yerengurí. ³⁴Yendo uni kumi kusi-kusi yano yorangurí nu sikíye te yunangurí. Naru kano uni piyimimbo yeño ononoye ta yerengurí, quko njuro ninguningu tangurí. Dokoro ye njande ijangurí, yeño ononoye hamó qu nu suki-suki yorote.

³⁵Ye Anutuko o meté te yunoweya njuro kondé inoyotengo. Njunde njuroko ino-ino nu ma rotowero. Njuko kimo meté horé mu teweya. ³⁶Kondé kanji. Njunde tero Anutu koro ino-inoyó nu howeroqota o meté Anutuko yunowero mande kusiyaró nu siyowango. ³⁷Dokoro naru tukuni nanje

“Uni maheweya njuko waka ta maheweya.

³⁸ Quko nenengo unine injondutuyówore ronenejowí tete njuko yoto-yoto reweya.

Ko soreweya tiníqo
eneño ninguningu kama tewano.”

³⁹Noreko uni sorero piyo tewero qu kini. Kini, nore injondutuwoyato rambaruru konjo yoreweya.

Injondutu tewero murí

11 ¹Injondutu tewero murí njuko njandiro: nore njande injomukoteto, o meté mu njuro sopoyoteto nu hamó maheweya. Ko njande injomukoteto, oka tonenanimbo kama qeneyote nu hamó yorote. ²Hamó, usisambato njuro injomukoro owé parámi rangurí.

³Nore injondutu tero njande njato tondanete, Anutu koro mandímbo o soso towaró. Njunde tiní o sóqewíwore o soso qeneyoteto nu tunoqemukaró.

⁴Apeliko injondutu tero Anutu o qa-qa^q te inaró, ko o qa-qa njundo Keinko o qa-qa taró nu takaró. Njunde tiní Anutu enenjombo o qa-qa njuro metéjoro, uni ronenejowí,^r ye nekaró. Apeliko njunde tero khumaró, ko khumaró njuko watí yesowoní inoyoteto.

⁵Enokiko injondutu tiní Anutuko riní kama khumoro kinanje samboko oró. Njunde tiní unindo seqaro kama qenengurí. Dokoro, Enok nokono watí yora quno Anutuko eneño muríyó njuro metéjaró. ⁶Ko uni ka injondutu kama teyote tiníqo, Anutuko oteteyó njuro kama metéjoweya. Dokoro uni kato Anutu tangímo uyarewero inote tiníqo, koretero njande injoweya, Anutuko yote ko uni ene seqayotengo nu kimo meté yunoyote.

⁷Noako injondutu tero sasaro tero Anutu koro manjó howaró. Komo Anutuko o imemongo tunoqeweya njuro miraró. Koretero o nu kama qene

^q 11:4 “o qa-qa ” njunde qu unipareto Anutu injoro potoroku te inoro nú-qare ka o qa-qa uni inoyi uroní khumoní wondo yakutímo njuno qaró. ^r 11:4 “uni ronenejowí ” njuko Anutuko genero potó moré kini tiní eneño uniyó tunoqete.

yotoro mandí ñu iñoro wañgo towoní eneño suwisawiyó rambaruru ka takañgurí. Enendo iñondutu taró ñuwore noko unipare yoriní mande khono yorotoní topé piyimi rañgurí. Kowe Anutuko Noa, uni roneneñowí, ye nekaró.

⁸ Abrahamko^s iñondutu tero Anutu koro mañgó howaró. Komo Anutuko nekoru, mira ka kunowe teteno, ñunde mitoro mira ñuno asáñaró. Asáñoní ñuno uyaró, quko dano uyareweya ene ñu kama iñaró. ⁹Asa iñondutu tero noko Anutuko inaró quño ñuno yora, quko mira ñuro simburí kini. Eneya Aisak, Yakop ñuyako o meté Anutuko yunowero mande kusiyaró ñuro simburí. Quko ñu mirako ñuno ya hamó ñuno kama towañgurí. Kini, tuwi yamaru koroworo uyare maheyañgo. ¹⁰Dokoro Abrahamko, imemongo ya yendé hamó quño ñuno yorowano, ye iñoyara. Ya yendé ñu Anutu eneñombo rokóñoro towoweya, ye iñaró.

¹¹Sarako ñuya iñondutu tero qahu taró. Hamó, Abraham koñgomu horé taró, quko, Anutuko mande kusiyaró ñu hamó nañge, ye iñoní Anutuko wimbu inoní Sara qahu taró. ¹²Ñundiro nañge uni ka koñgomu tero khumowero taró, quko simó sowe qambu quro awaye tunoqaró. Simó soso ñuko sambo koro tutu wata weyowero mepémo kini ñunde qembe, ko sotama wata weyowero mepémo kini ñunde qembe.

¹³Ñu unipare ñuko iñondutu tero, yate khumañgurí. O soso Anutuko yunowero mande kusiyaró ñu kama siyañgurí. Kini, kinange kañero o kapiyamo ñuro toñetero niñgu-niñgu tañgurí. Ko ñande yero iñañgurí, “Nore noko ñaro qu kini, mira ñaro simburí kini.” ¹⁴Nore mande ñunde qu iñoro ñande iñoteto, uni ñunde qundo eneño miraye hamó ñu seqayañgo. ¹⁵Ko mira komo rotañgurí ñuro iñoro ñunde yañgurí tiniño, meté ñuno kañuya uyarewañgo. ¹⁶Quko mira meté horé meyowo ñuro seqañgurí, mira ka samboko yote. Ñunde ñuro unipareto, “Ene noreño Anutunani,” yewañgo quño Anutuko ñuro kowi piyo kama tete. Dokoro, ñu unipare ñuro ya yendé ka roñgaruwaró.

¹⁷⁻¹⁸ Abrahamko iñondutu tero nañuní urowero taró. Komo Anutuko mande kusiyoro ñande miraró, “Keño sowe qu Aisak kowí mongo tunoqewañgo.” Quko enendo Abraham towononí mañgó howero nañuní kanata ñu rero o qa-qa tewero urowero taró. ¹⁹Ñunde tero ñande ye iñaró, “Asa Aisak khumoníño, enina, Anutu eneñombo meté riní otoqoweya.” Ñunde ñuroko Abrahamko simó ñu uni tapu koñgo pitu ko raró ñunde qembe.

²⁰Aisakiko iñondutu tero o kumi imemongo tunoqeweya ñuro iñoro Yakop koya Iso koya puriño yereró.

²¹Yakopko iñondutu tero koñgomu tero khumowero taró quño ñuno Josep koro naño-simó irisa ñu puriño yerero usú towo kondéqero huariri taró.

^s 11:8 “Abraham” ñuko Juda uniparetoro pukoye.

²² Josepko iḡondutu tero koḡgomu tero khumowero taró quño ḡuno ḡande yaró, “Imemoḡo Anutuko Israel yoriní Isip noḡḡo toḡewango. ḡu naruko ḡuno neneḡo wimbune rero toḡi qembe,” yaró.

²³ Moses koro iwí-nimímbo iḡondutu tero Pero^t koro kama sorero mandí wendaqariyó. Nimímbo Moses pisiyoroqota qenero, simó meté horé, ye iḡariyó. ḡunde ḡuro re tapuḡori kombo kapusa ḡunde sóqe yora.

²⁴ Mosesko yate parámi tero iḡondutu tero owé parámi rewero quro piyimiḡaró. Komo Pero koro nambunímbo naniḡuní tunoqaró, quko ḡuro huwóḡaró. ²⁵ Kini, ene ḡande ye iḡaró, “No khe u-u ḡunde qu howero naru tukuni niḡgu-niḡgu tewano, peka. Quko ḡu otete piyimi. Kini, Anutu koro unipareyómboya quhurí nange korowowano.” ²⁶ ḡunde yero enendo Kristo^u ḡunde qembe kowi piyo raró, quko kowi piyo teroqota kimo meté reweya. Ko kimo meté ḡuko Isip koro onoḡoye soso takate.

²⁷ Enendo iḡondutu tero wiri yerete unindoro saḡgirí parámi ḡuro kama sorero Isip roto toḡeró. ḡunde tero kondé kaḡaró, dokoro Anutu sóqewí ḡu qeneró. ²⁸ Enendo Anutu iḡondutuwo ro Taka yereró quro o ne-ne ḡu riní tunoqiní sitú makono raḡḡurí. ḡunde ti sambo simó^v saḡgirí ḡu gene taka yerero Israel koro simóye korete ḡu kama yoriní khumaḡurí.

²⁹ Israel unipareto Anutu iḡondutuwoyi Windi Mandumi ḡu usowoní noko hariní ḡuwore kaḡero uyareḡurí. Quko Isip unindo yohowaḡurí quño ḡuno sono ḡundo oro maḡgorero muḡo yereró. ³⁰ Enendo iḡondutu tero Jeriko yendé parámi ḡuro hoḡḡo ḡu naru kande saḡiyoro irisa ḡunde wuriryoyiqota hoḡḡo ḡu huqe umbu raḡaró.

³¹ Rahap, ḡu khe pare ḡundo iḡondutu tero uni irisa mondó ta mahiriyó ḡu samaka yereró. ḡunde ḡuro Anutuko uni mandí wendaqḡurí ḡu rambaruru yereró quño ḡuno pare ḡu kama khumaró.

³² Ko mande ka sowe tewanope ma kini? Kini, nondo Gideon, Barak, Samson, Jepita, Dewit, Samuel ko ye-ye uni^w kanata-kanata ḡuro yewero mepémo kini. Mande yewero naru kaḡuya mepémo kini.

³³ ḡu uni ḡuko iḡondutu taḡḡurí ḡuwore kuma tero wini parámi taka yereḡurí, otete roneneḡowí^x tero unipare sopo yereḡurí, o kumi Anutuko yunowero mande kusiyaró ḡu siyaḡurí, laiyoḡ^y maḡḡo ḡu wisumuḡḡurí. ³⁴ Kewámbo yoqawero ḡu winzumaḡurí, unindo sukepo yuroyi khumowaḡḡo ḡu roto takaḡurí, wimbuye moré kini qundo wimbu raḡḡurí, kuma tewero quro wimbí tero uni wini meyowo ḡu

^t 11:23 “*Pero*” ḡuko *Isip* koro wiri yerete uni ḡu. ^u 11:26 “*Kristo*” ḡuko Yesu nange, asa Anutuko rokóḡoní mahero wiri yerete uni parámi horé tunoqaró ḡu. ^v 11:28 “*sambo simó*” ḡuko komo suki-suki Anutuko unipare kama yoriní tunoqi sambo simó yondowaró. Ko itaka eneḡo sunará teyotengo. ^w 11:32 “*ye-ye uni*” ḡuko Anutuko mandí yunoní unipare yunaḡurí. ^x 11:33 “*otete roneneḡowí*” ḡuko Anutuko nore rokó yiriní noreḡo murínani eneḡo murí howeyote. ^y 11:33 “*laiyoḡ*” ḡuko númbowe parámi ka, pusi qembe, quko wimbí moré, mití parámi.

yohowaŋguri. ³⁵Iñondutu pare kumimbo suwisawiye komo khumaŋguri qu pitu ko otoqoyi yoraŋguri.

Quko unipare kumimbo kowe surumí parámi taŋguri, quko quhuri ŋu takawero kama iŋaŋguri, dokoro, khumowato qunoko pitu uni tapu koŋgo otoqoro yoto-yoto meté horé rewato, ye iŋaŋguri. ³⁶Uni piyimimbo iñondutu unipare kumi huwó mande yimitoro utómbó haususu yereŋguri. Ko utó kondé rero kumi kusi yerero kusi-kusi yano yorotaŋguri. ³⁷Unindo kumi yuri khumowero ŋuro wondo saŋayemo raŋaŋguri, kumi koweye toŋoyi irisa taró, kumi sukepo yuraŋguri. Iñondutu unipare kumimbo sipsip koya meme kowí nange siyoro tuwiye kusiyoyaŋgo, onoŋoye moré kini, unindo quhuri parámi yunoro o piyimi nange te yunaŋguri. ³⁸Mira wimbímo, wimbo-wimbo mira purímo uyareŋguri; wondo yayómo sóqaŋguri, meré quroko eteyaŋguri. Ŋu unipare ŋuko meté nange, quko enendo unipare piyimi horé keweroyemo yoraŋguri.

³⁹Unipare soso ŋuko Anutu iñondutuworo toŋímo owé meté horé raŋguri. Quko o meté Anutuko yunowero mande kusiyaró ŋu kama siyaŋguri. ⁴⁰Kini, Anutuko noreŋo o meté meyowo karo iŋaró, asa unipare ŋuya noreya huruwato naru kanata quno yoriní meté horé tunoqewato.

Anutuko eneŋo simó soso roŋgaru yereyote

12 ¹Asa ko iñondutu uni qambu ŋundo iñondutuye ri tunomo tunoqaró, ko enendo mahe kaŋe koporé qembe nore wuriri yere yiyoteŋgo. Ŋunde ŋuroko o soso nore nondowoyote ŋuya quhurímbo kusi nereyote ŋuya rotoya wimbu titiyoro Anutuko khe witu yere yunaró ŋu howato. ²Ŋunde te howero Yesu kondé qeneto. Enendo komo iñondutunani riní hurí taró, ko iñondutunani ŋu riní meté horé tete. Unindo owé piyimi inoro kowe surumí inoro tipiririko^z uraŋguri. Quko ŋuro kama iŋaró. Kini, imemoŋgo niŋgu-niŋgu parámi reweya ŋuro nange iŋaró. Ŋunde uroyi khumoro otoqoro Anutu koro kandí kondéwore kunditaró. ³Uni piyimimbo quhuri parámi iniqo quhuri ŋu korowaró, ŋuro iŋoyi qembe. Ŋunde tero wimbu rero newondeye rukisoyowaŋgo.

⁴Ye quhuri koya kuma tero pitoyoteŋgo. Quko kuma teyoteŋgo quno ŋuno sitúye kama umbuyoní. ⁵Anutuko rukiso yerewero quro mande ka yete, quko ye mande ŋu kape teteŋgo, peka. Ŋande yete,

“Naŋone, Uni Parámimbo roŋgaru kereyote quno ŋuno,
 ŋuro ma yesaraŋowero.
 Ko ronene kereyote quno ŋuno

^z 12:2 “tipiriri” ŋunde quko wiri yerete uni kumimbo eneŋo uni saŋgiríye yorerero ŋuno uroyi khumoyaŋguri.

newonde quhurí ma tewero.

⁶ Dokoro, Uni Parámimbo uni ka hamó ijo inoyote ñu roŋgaruwoyote,

ko enendo uni ‘Naño-simóne,’ ye neko yereyote ñu ronene yerewero ñuro quhurí yunoní korowoyoteŋgo.”

⁷ Anutuko ye roŋgaru yereyote quno ñuno kondé kañi qembe. Enendo o te yunoyote ñuko uni kato ene nañuní horémboya te inoyote ñundo. Dani simó ka iwímbo kama roŋgaruwoyote? ⁸ Anutuko eneño naño-simó soso ñu roŋgaru yereyote. Asa ko ene kama roŋgaru yereyote tiníqo, yeko khe simó qembe nañge, eneño simó horé kini. ⁹ O kañuya ñuro iñoyi. Kowenani sañanímbo awa ñundo roŋgaru nereyoteŋgo, ko ñuro iñoro ará te yunoyoteto. Quko Anutuko yuqananimbo iwí yote. Ñunde ñuro meté horé kasiramo yate yoto-yoto rewato. ¹⁰ Dokoro awa-awanani nokono qundo ijo-iñoye meté howero naru tukuni ta roŋgaru nereyoteŋgo. Quko Anutuko samaka nerewero quro roŋgaru niriní eneño murí meté horé rewato. ¹¹ Hamó, itaka roŋgaru nereyote quno ñuno niñgu-niñgu kama teyoteto. Kini, newonde surumí teyoteto. Quko imemoŋgo roŋgaru nereyote ñuko eñgé tiní nore newonde ime tero roneneñowí mu tewato.^a

¹² Ñunde ñuroko kandeye wimbí moré kini ñuya potóye wimbí moré kini ñuya rika kondéreweya. ¹³ Ko khe roneneñowí towoyikata uni khí piyimi ñundo kama piyo teweya. Kini, kañuya meté tunoqewaŋgo.

Anutu koro samaka-samaka tuwó ñu ma rotowero

¹⁴ Uni soso koya newonde ime yowero ñuro kho kondé ti qembe. Ko unipare meté horé^b tunoqewero ñuro kho kondé ti qembe, dokoro uni kato ñunde kama tunoqeweya tiníqo, Uni Parámi kama qeneweya. ¹⁵ Toñeteyuriyate keweroyemo qu kato Anutu koro samaka-samaka tuwó^c ñu takaro umbu rañoweya koro. Yate newonde piyimi koro o yuwoyó ka wotero ye kumi yoriní Anutu toñímo pusú tewaŋgo koro. ¹⁶ Yate se simbururu uni ka tewaŋgope ma Iso ñunde qembe Anutu rotowaŋgo koro. Iso iwímbo nañuní korete quro wimbu towaró, ñunde ñuro iwí khumoní oyó ñu soso siyoweya. Quko o qímbo qu kanata nañge rewero ñuro wimbu ñu koneyó inaró. ¹⁷ Ko ye iñomukoteŋgo, imemoŋgo enendo nañuní korete quro puriño ñuro iwí kirayaró, quko ñu kama raró. Hamó, tendo parámi taró, quko iwímbo o komo taró ñuro ene rohoréñowero mepémo kini.

^a 12:11 “roneneñowí tete” ñuro murí muko ñandiro: asa Anutuko uni ka, pare ka yiyoro potó moré kini tiní eneño unipare qu ka tunoqetenggo. ^b 12:14 “unipare meté horé” ñuko oteteye soso muko meté nañge kini. Kini, owé ñu “unipare meté horé” ñuro murí muko ñandiro, “Anutu koro unipare” nañge. ^c 12:15 “samaka-samaka tuwó” ñuko Anutu eneño nore samaka yereyote. Kimoyó moré kini.

¹⁸Qeni, Israel unipareto komo tanġurí qu ġu ye kama tanġurí. Enendo mira purí meté towowero quno mahenġurí, mira purí ka qayaró quno ġuno mahenġurí quko huriri matú wimbí quroko ġuno mahero sasaro tanġurí. ¹⁹Mahi unġu huwoní inġanġurí, ko mande ka ġuya inġoro sasaro tero, “Ĵunde roto,” yanġurí. ²⁰Dokoro mande ġundo quhurí yunoro mande kondé ka ġande yaró, “Ko uni kape ma númbowe ka mira purímo ġano oníqo, asa ye wondo raġo uri khumoweya.”^d ²¹O soso ġu ġenero sasaro parámi tanġurí, ko Mosesko ġuya ġande yaró, “No yukuworo sasaro teteno.”^e

²²Quko yeko ġunde kini. Yendo Saion^f mira purímo mahenġurí, ko Anutu yoto-yotoyó moré ġuro yendé parámi ġuko Yerusalem samboko yote quno ġuno mahenġurí, ko sambo simó^g huru-huru parámi tero niġgu-niġgu teyotenggo quno ġuno mahenġurí, ²³ko simó korete qu owéye Anutuko samboko nakayáġaró qundo huruwoyotenggo quno ġuno mahenġurí, ko Anutu, ġuko uni soso koro ronda-ronda quno ġuno mahenġurí, ko uni roneneġowímboro^h yuqaye meté horé tunoqanġurí quno ġuno mahenġurí, ²⁴ko Yesu, ġuko mande kondé keta quro uni keweroko uni yote quno ġuno mahenġurí, ko sitúġo raġaró quno ġuno mahenġurí. Sitú ġundoko mande yini inġoyoteto, ko mande yete ġuko mande Apel koro sitúġombo yaró ġu takate.

²⁵Inġoyi, Anutu mande yeyoní nanġe ma huwóġowero. Dokoro komo nokono ġano unipareto eneġo oresaka mande ġu inġoro huwóġoro rambaruru kama takanġurí. Asa ko norendo sambo koġgo oresaka mande ġu inġoro huwóġowato tiniqo, rambaruru ġu date takawato? ²⁶Komoko Anutu maġgómbo mira riní yukuwaró. Ko itaka nore ġande yimirote, “Naru kanġuya noko nanġe kama rewe yukuwoweya. Kini, noko ġuya sambo ġuya rewe irisa-irisa yukuwowari.”ⁱ ²⁷Asa ġande yete, “Naru kanġuya.” Ĵu mande ġundo nore ġande witú yereyote, o soso eneġombo towaró ġu se rotoweya, dokoro ġu meté yukuwoweya. Quko o kumi yukuwowero mepémo kini, ġundo nanġe yowaġgo.

²⁸Anutuko nore wiri yereyoní noko kondémo khetero kanġeyoteto. Noko ġu kama yukuwoweya. Ĵunde ġuro nore ene yunġunaġato, ko ġu murí ġuwore Anutuko hamó ġene inġoro ará te inoro yambo hariri tato ġuro niġgu-niġgu teweya. ²⁹Dokoro, “Anutunani ġuko te suru qembe tero o soso qamukoyote.”^j

Kho meté mu nanġe ti qembe

13 ¹Naru rokóġo uni topoye newonde meté yunoyuri qembe. ²Ko uni ka yendé meyowo moġgo yeno ġuno mahiqo, yore yayemo

^d 12:20 Toġenġurí 19:12-13 ^e 12:21 Hutuġo Mande 9:19 ^f 12:22 “Saion” ġuko Yerusalem nanġe, dokoro Yerusalem Saion purímo saġano yora. ^g 12:22 “sambo simó” ġuko komo suki-suki Anutuko unipare kama yorini tunoqi sambo simó yondowaró. Ko itaka eneġo sunará teyotenggo. ^h 12:23 “uni roneneġowí” ġuko Anutuko ġenero potó moré kini tiní eneġo uniyó tunoqete. ⁱ 12:26 Hagai 2:6 ^j 12:29 Hutuġo Mande 4:24

oyi qembe. Otete ŋu ma rotowero, dokoro uni kumimbo ŋunde yore oŋguri, quko kama iŋaŋguri, uni ŋuko uni horé qu kini, sambo simó^k naŋge. ³Uni kusi-kusi yano yoteŋgo ŋuro ŋande ye iŋoya, nore ŋuya kusi-kusi yano yoteto, yero samaka yiri qembe. Ko uni saŋgirimbo uni kumi o piyimi te yunoyoteŋgo quno ŋande ye iŋoya, nore ŋuya quhurí ŋu korowoyoteto, yero samaka yiri qembe.

⁴Yari kame tariyó qundo murí tariyó ŋuro kondé iŋoya otete sara qu naŋge tiri qembe. Dokoro Anutuko unipare se simbururu teyoteŋgo ŋu ronda yereweya. ⁵Mone ma qene nuŋguwowero. Kini, ŋande iŋoyuri qembe, onoŋonani itaka towoyoteto, ŋu koro ŋu. Dokoro Anutuko ŋande nore nimiraró,

“Naru rokóŋo ye kama yorotowano,
kama huwó yerewano.”

⁶Ŋunde ŋuro kondé kaŋero ŋande yeteto,

“Uni Parámimbo samaka niriní
no kama sorewano.

Uni kato oka kama te nunowaŋgo.”

⁷Anutu koro huru-huru^l koro sopo-sopo uni ŋuro iŋoyuri qembe, ŋundo Anutu koro mandí ŋu rero ye yimitoyoteŋgo. Ye eneŋo oteteyemboro eŋgé ŋuro iŋoya iŋondutuye howi qembe.

⁸Komo, ko itaka, ko imemoŋgo ŋuya Yesu Kristoko^m eneŋo muríyó ŋunde naŋge howeyote, kama rohoréŋoyote. ⁹Uni kato mande enesó-enesó rondaqe yunoyowaŋgo tiniŋo, mande ŋu ma howewero. Dokoro nore Anutu koro samaka-samaka tuwóⁿ ratoka newondenani rukisoyoní kondé yoní. Quko o neyoteto ŋundo newondenani kama samakaŋoyote. ¹⁰O qa-qa unindo Anutu koro tuwi yamaruko o qa-qa^o te neyoteŋgo. Quko norendo wondo yakutí enesó moré, ko o qa-qa uni ŋundo ŋu noŋgo o newero mepémo kini. ¹¹O qa-qa unindoro tapá unindo uniparetoro quhuríye rotowero quro númbowe sitúŋo ŋu siyoro Wembó Surumí Horé quroko oyoteŋgo. Quko númbowe koro koweye siyoro yendé sumeyoro ŋuno qayoteŋgo. ¹²Ŋunde naŋge Yesuko sitúŋowore unipare yoriní meté

^k 13:2 “sambo simó ” ŋuko komo suki-suki Anutuko unipare kama yoriní tunoqi sambo simó yondowaró. Ko itaka eneŋo sunará teyoteŋgo. ^l 13:7 “Anutu koro huru-huru ” ŋuko unipare soso Yesu iŋondutuwo nokone-nokone ŋuno huruwoyoteŋgo qu. ^m 13:8 “Yesu Kristo ” - komo suki *ye-ye unindo* Anutuko uni ka rokóŋoní mahero wiri yerete uni parámi horé tunoqeweya qu karo yaŋguri. Juda unipareto uni maheweya ŋu, “Kristo,” ma, “*Mesaiya* ,” ye nekaŋguri. Asa Yesu mahiní eneŋo unipareyó, “Kristo Yesu,” ma, “Yesu Kristo,” naŋge ye nekaŋguri. ⁿ 13:9 “samaka-samaka tuwó ” ŋuko Anutu eneŋombo nore samaka yereyote. Kimoyó moré kini. ^o 13:10 “o qa-qa ” ŋunde qu unipareto Anutu iŋoro potoruku te inoro nú-qare ka o qa-qa uni inoyi uroní khumoní wondo yakutímo ŋuno qaró.

horé tunoqewero ηuro yendé sumeyoro kowe surumí taró. ¹³Asa ko ene kowi piyo korowaró ηunde nanje korowoya yendé sumeyoro eneno uyareto. ¹⁴Dokoro noreño yendé parámi suki yoweya qu noko ηano kama yote. Quko yendé parámi ηu imemoηgo tunoqeweya ηuro tojete sopoyoteto.

¹⁵ηunde ηuroko naru rokóηoro Yesuwore maηgoto Anutu owí yesoworo seré te inoya o qa-qa ηunde qembe tato. ¹⁶Ko o meté unipare te yunoya topoyemboro iηoya kumi se samaka yiri qembe. ηu otete meté ηu ma kape tewero, dokoro Anutuko o qa-qa meté ηunde quro hamó metéηoyote.

¹⁷Yeηo sopo-sopoyemboro mandeye howero kasirayemo yuri qembe, dokoro yeηo sopo yereyoteηgo ko imemoηgo eneηo khoye ηuro Anutu mirowaηgo. Ye ηunde tiqo, enendo niηgu-niηgu tero newonde quhurí kama tero kho meté tewaηgo. Ko ηunde kama tiqo, ene samaka yerewero mepémo kini.

¹⁸Noreηo hariri ti. Dokoro ηande iηoteto, iηo-iηo meté mu nanje howeyoteto, ko otete meté mu nanje howewero ηuro iηoyoteto. ¹⁹Hamó, neneηo hariri tiqo, Anutuko no samaka niriní pitu ko yeno waka ta uyarewano.

²⁰Anutu, ηu newonde ime ηuro simburí, enendo sitú raηoro mande kondé suki-suki yote ηu kusiyaró. Sitú ηuwore enendo Uni Paráminani Yesu, ηu sipsip sopo-sopo parámi ηu, pitu ko uni tapu koηgo riní otoqaró. ²¹Asa Anutuko iηo-iηoyó howewero quro wimbu ye yunoní. Ko nore o soso Yesu Kristowore teyoteto ηuro metéηoní. Enendo Yesu Kristowore nore norero o teyoteto ηuro metéηoní. Naru suki-suki owé parámi inowato. ηu hamó.

²²Topo okite, mande nondo newondaye rukisoyowero nakayáηoteno ηa iηi, dokoro sokome tukuni nanje nakayáηoteno.

²³ηande yimitoyoteno, unindo toponani Timoti rotoyi waka ta mahiníqo, nore irisa ye yiyowero uyarewano.

²⁴Norendo sopo-sopoyemboya unipare meté horé^p soso ηuya yuηguna yereteto. Itali mira koro unipare kumimbo ye yuηguna yereteηgo.

²⁵Anutu koro samaka-samaka tuwó^q ηu ye soso quno yoní.

^p 13:24 “unipare meté horé” ηuko oteteye soso muko meté nanje kini. Kini, owé ηu “unipare meté horé” ηuro murí muko ηandiro, “Anutu koro unipare” nanje.

^q 13:25 “samaka-samaka tuwó” ηuko Anutu eneηombo nore samaka yereyote. Kimoyó moré kini.